

ივანე ჯავახიშვილის სახელობის თბილისის
სახელმწიფო უნივერსიტეტის რექტორის
2014 წლის ,, “ № ბრძანების
დანართი N1

სსიპ - ივანე ჯავახიშვილის სახელობის თბილისის სახელმწიფო
უნივერსიტეტში ქართველი მეცნიერის და საზოგადო მოღვაწის - სოლომონ
დოდაშვილის სახელობის სტიპენდიის დანიშვნის, სტიპენდიანტის
გამოვლენისა და სტიპენდიის მინიჭების წესი

მუხლი 1. ზოგადი დებულებები

1. სსიპ - ივანე ჯავახიშვილის სახელობის თბილისის სახელმწიფო უნივერსიტეტში (ტექსტში შემდგომ - „უნივერსიტეტი“ ან „დაწესებულება“) ქართველი მეცნიერის და საზოგადო მოღვაწის - სოლომონ დოდაშვილის სახელობის სტიპენდია (შემდგომში - „სტიპენდია“) ინიშნება ქაქუცა ჩოლოყაშვილის სახელობის სრულიად საქართველოს ჩოხოსან რაინდთა დასის დარბაზის ინიციატივით.
2. სტიპენდიის დაწესების მიზანია ჰუმანიტარულ მეცნიერებათა ფაკულტეტის ფილოსოფიის მიმართულების ბაკალავრიატის საგანმანათლებლო პროგრამის სტუდენტთა (შემდგომ ტექსტში – „სტუდენტი“) წახალისება.
3. სტიპენდია ენიჭება ერთ სტუდენტს ყოველწლიურად, ერთი აკადემიური წლის ვადით.
4. სტიპენდიის მოსაპოვებლად კონკურსის გამოცხადების წინაპირობას წარმოადგენს ერთი წლის სტიპენდიისათვის განკუთვნილი თანხის სრულად გადმორიცხვა უნივერსიტეტისათვის სტიპენდიანტებისათვის შესაბამისი ოდენობის სტიპენდიის ყოველთვიურად ჩარიცხვის უზრუნველსაყოფად.

მუხლი 2. სტიპენდიის მინიჭების პირობები

1. სტიპენდია ყოველი სასწავლო წლის დასაწყისში (არაუგვიანეს 15 ოქტომბრისა) გაიცემა (ინიშნება) წინა სასწავლო წლის შედეგების გათვალისწინებით, შერჩევის საფუძველზე.
2. სტიპენდია არ გაიცემა:
 - ა) ბაკალავრიატის პირველი სასწავლო წლის სტუდენტზე;
 - ბ) სტუდენტზე, რომელსაც უმაღლესი განათლების შესაბამის საფეხურზე გავლილი აქვს ძირითადი საგანმანათლებლო პროგრამისთვის განსაზღვრულ პერიოდზე მეტი;
 - გ) წინა სასწავლო წლის გაზაფხულის სემესტრში მობილობით გადმოსულ სტუდენტზე;
 - დ) წინა სასწავლო წლის შემოდგომის ან გაზაფხულის სემესტრში სტატუსშეჩერებულ სტუდენტზე;

ე) სტიპენდიის დანიშვნის მომენტისთვის სხვა სტიპენდიის/საუნივერსიტეტო დაფინანსების მქონე სტუდენტზე;

ვ) სტიპენდიის მიღების სასწავლო წელს სტუდენტის სტატუსის შეწყვეტის/შეჩერების შემთხვევაში.

მუხლი 3. სტიპენდიანტის შერჩევის წესი

1. სტიპენდიით დაფინანსებისათვის კანდიდატის შერჩევას ახორციელებს სტიპენდიის მიმნიჭებელი კომისია (შემდგომ ტექსტში - „კომისია“).

2. კომისია იქმნება ჰუმანიტარულ მეცნიერებათა ფაკულტეტის წარდგინებით რექტორის ბრძანებით, არანაკლებ 5 წევრის შემადგენლობით, შესაბამისი სასწავლო-სამეცნიერო მიმართულების სპეციალისტებისგან.

3. სტიპენდიით დაფინანსებისათვის ბაკალავრიატის შესარჩევ კანდიდატთა შეფასება განხორციელდება აკადემიური მოსწრებით, რომელიც გამოითვლება სტუდენტის მიერ წინა სასწავლო წელს სასწავლო კურსებში მიღებული (არანაკლებ 60 კრედიტი) შეფასების საშუალო არითმეტიკულის გამოანგარიშებით.

4. ორი ან მეტი ერთი და იმავე საუკეთესო აკადემიური მოსწრების მქონე კანდიდატის არსებობის შემთხვევაში კომისიის მიერ სტიპენდიანტის შერჩევა განხორციელდება შემდეგი კრიტერიუმების მიხედვით:

ა) სამეცნიერო ნაშრომების გამოქვეყნება (წინა სასწავლო წელს გამოქვეყნებული/დასაბეჭდად გადაცემული ნაშრომები).

ბ) სამეცნიერო კონფერენციებში მონაწილეობა (წინა სასწავლო წელს ჩატარებული კონფერენციები).

გ) უნივერსიტეტის გაცვლით და საერთაშორისო საგანმანათლებლო პროგრამებში მონაწილეობა.

5. საინფორმაციო ტექნოლოგიების დეპარტამენტი კომისიის მიმართვის საფუძველზე ვალდებულია კომისიას მიაწოდოს ინფორმაცია ფილოსოფიის საბაკალავრო პროგრამის საუკეთესო აკადემიური მოსწრების მქონე სტუდენტების შესახებ.

6. კანდიდატების მიერ წარმოდგენილი დოკუმენტების ამ მუხლის მე-4 პუნქტის „ა“, „ბ“ და „გ“ ქვეპუნქტებთან შესაბამისობისა და სტიპენდიის გაცემის თაობაზე დასკვნას ამზადებს კომისია, რომელსაც წარუდგენს რექტორს.

7. წინამდებარე წესის მოთხოვნათა შესრულების მიზნით კომისია უფლებამოსილია დაადგინოს ყველა ის აუცილებელი პროცედურული საკითხი, რაც განსაზღვრული არ არის ამ წესით.

მუხლი 4. ინფორმაცია სტიპენდიის მინიჭების შესახებ

1. ინფორმაცია გამოვლენილი სტიპენდიანტების შესახებ, არაუგვიანეს ყოველი წლის 25 ოქტომბრისა, ეგზავნება ქაქუცა ჩოლოყაშვილის სახელობის სრულიად საქართველოს ჩოხოსან რაინდთა დასის დარბაზს.

2. სტიპენდია გაიცემა შესაბამისი სასწავლო წლის (10 თვის) განმავლობაში თვეში 150 (ასორმოცდაათი) ლარის ოდენობით.